

## **Kayëte kigëna mba Piyer Wade yehëhna hnë inji kayëte**

Afayik Piyer ña herëk inji kayëte wati nte kobëko gë icëm ntëwu (mpëd yëbëlan bëhn wafëhw imbëd g'iryawñ g'imbëd gë bëhn wafëhw imbëd g'iryawñ g'imbëd gë wahnah (65-69) ga ndëcëk hnagi Yesu ÿa). Kerëhnëkëhni vële hwëtahnëk va ßare yëtëlëfuhna bi ne nkeniho. Niradëhëhni soñe vëharan wamër va. Andënkwëtehnëdëhëhni gante nkwënëdëni ikwëtahn dëw hni ka do ikwëtahn dëw hni ña kahnëk hn'ile njawëk. Yesu mbokajëd do atëfëkëhni kahnëndani hnë umë.

Wëlin wanës wakwëhn nafa hn'inji kayëte: gë fere, kila, vëharan wamër, iyët.

Wëlin gante nke kayëte ka:

Simpayi (1.1-2)

Gante tëfëka nkeni vële kwëhnëk Këris va (1.3-11)

Kahnëndaryin hnë vile haranirun hna (1.12-21)

Soñe vële haranëd wamër va (2.1-22)

Paryi Yesu mbokajëd (3.1-18)

### *Simpayi*

<sup>1</sup> Ami, Simo Piyer\*, aryokunëhn do afayik Yesu Këris, herëhnëdëhëhni aki vahnë vële njëdak

---

\* **1:1** 1.1 Simo Piyer: hnë vëkayëte vëndañ Simo wacik Simeyo.

Wën ikwëtahn nte hëñëk gë ntëw̃ fu ña. Usatah Yesu Këris, umë ale ye Wën fu do Afehët, yëdfaku inji kwëtahn.

<sup>2</sup> Arabi yam ÿa g'ipërëna Wënu ña nkwënaw̃ duş, gë fere iyët Wënu gë Yesu Ahwëhn fu ÿa.

### *Imac do itëhna Wën*

<sup>3</sup> Gë fanka falëw̃u fa Wënu ña njëdakëfu fop ile valëkëfu ÿa soñe nkehahnin gante ñad ka. Antik rac gë fere uyët ule hwëhnayinëk soñe lëw̃u, umë ale w̃acëkëfu gë icëmb do g'ipërëna camah ntëw̃u ña. <sup>4</sup> G'icëmb do g'ipërëna tac Wënu ña anjëdakëfu viyë vihnëfak gë vifërën had gante ntehnëko kobëri ka. Antik gë fere vëyin, soñe afehëtahniwu hnë viña vimeh iyi duniya vile fërëkahnëdëhëhni vahnë, do ayentahniw̃u ile nke Wënu ña.

<sup>5</sup> Soñe umë ye kamënarinyin awënu kwëtahn hun hna ipërëna camah; hnë ipërëna camah hna gwënëryin uyët Wënu ña; <sup>6</sup> hnë uyët Wënu hna gwënëryin imëk vankaf hun; hnë imëk vankaf hun hna gwënëryin iduñëna; soñe iduñëna ña gwënëryin nkeya nte ñad Wënu ña; <sup>7</sup> hnë nkeya nte ñad Wënu ña gwënëryin injahnël hun ña; hnë injahnël hun hna gwënëryin injahn Wënu ña. <sup>8</sup> Kabi, ge kwëhnarun vanji vankeya, do ge pëlëk vënkahn va hnë w̃uhnë, antëwëdfun vifërën do ndokunëdfun duş do iyët hun Ahwëhn fu Yesu Këris nkwënad. <sup>9</sup> Bare ale wok kwëhnana vanji vankeya va, nke had ale w̃ëpëk; nudina duş. Andënkwëk Wënu ña njaryëka wameh wabë kobëri ña.

<sup>10</sup> Soŋe rac ye, vēyēnta mēn, kamēnaryin aliwu imac gē itēhna Wēnu ŋa njaw̃ g'ahaw̃ary hnē w̃uhnē. Kabi ge ntirun koyēna, yodiluhna muk hnē wameh hna. <sup>11</sup> Aki Wēnu ŋa kacadēhu g'afērēn Naw̃ nte wok puđina muk mba Ahwēhn fu do Afehēt fu Yesu Kēris hna.

*Vēle hnuk icēmb Kēris*

<sup>12</sup> Soŋe rac ye, lakēnde ayētu vēyin fop, do fēna ahahnēndawu hnē toña le wēryērūn yī, nkođefu ryēnkwētehnēndu kwēlēkwēl. <sup>13</sup> Catanēko, age cēmēla, andēnkwētehnēdēmu soŋe woŋu vēhnēgak. <sup>14</sup> Kabi njētēbu biyēđina cēmēđefu, had gante tufēko Ahwēhn fu Yesu Kēris. <sup>15</sup> Bare ntidēfu fop soŋe woŋu aryēnkwētahnēndu kwēlēkwēl vēyin age cēmēbu.

<sup>16</sup> Ante pēyaŷirunēho ŋa Ahwēhn fu yā Yesu Kēris mbokajēđ gē fanka, gena wēhnantul wahnahar nēsēhnirunēho. Bare nubun inaŷ ntēwu ŋa gē vinkēr vintēw̃ fu va. <sup>17-18</sup> G'umē nkebunēho kuŋ pacah hna, wati nte ntēnēnkawo do cēmbēhnēkawo Wēnu ŋa Rēm yā. Wati rac, hnē Icēmb Camah ntēwu hna, Wēnu ŋa nkwēryēndanēka kopa lēwu yā, ntehn: «Ayi ajē mēn ye ale yāhnēbu đus. Hnē umē natēđēho.»<sup>✧</sup> Do kopa rac, fuhnē dēnk nkwēryēbun matind ambin.

<sup>19</sup> Do fēna, tamahnēđefun g'ahaw̃ary wanēs wakila Wēnu ŋa. Anjivēnēđun ge kwētarun vintaŷary hun hna, kabi nke had lampu le fēđik hnē umēhwēry hafo Fac yā tēki, do Kēris,

✧ **1:17-18** 1.17-18: Matiye 17.1-5; Marēk 9.2-7; Lik 9.28-35

ikol sampërënkoli ɲa, pëtën wasakahn hun wã.  
<sup>20</sup> Ani gë iÿin fop, njëtëryin ɸus: wanës wakila  
 hnë Vikerëh hna matina vinahan vidëw hni hna  
 dënk. <sup>21</sup> Kabi pëgw kobëri ɲa, wanës Wënu ɲa  
 matina hnë ahnë. Bare Iyir Ipacah ɲa lidëhëhni  
 vahnë va nësëni wanës wante wãtik Wën hna.

## 2

### *Vëharaj wamër*

<sup>1</sup> Kobëri ɲa, hnë bulunda Isërayel hna  
 nkeniho wakila wamër. Aki fëna, vëryampo  
 matëdëni fagant hun, do ntehnëdëni vëharaj  
 ye, bare ile karajëdënihëhni vahnë va gena  
 toña. Nësëhnëdënihu wajira fo wamër wante  
 sëvehnëd vahnë, do ɲwëyëdëniha Aharaj ale  
 sosahnëk wameh wadëw hni. Soɲe umë ye  
 icëv ntëw hni ɲa tëkid ñap, do vëhni lik.  
<sup>2</sup> Vëyabah tëfëdënihëhni hnë ndakëntal meh,  
 antidënihëhni vahnë va njewëni nkaw toña ɲa.  
<sup>3</sup> Do ɲahñ dëw hni kori ɲa ntid nësëndëni pab  
 gë wuhnë wëhnantul wale ntini vëhni dënk,  
 ɸanko tokanihu. Bare ambiyëk ga cëbik kiti lëw  
 hni ÿa, napëdina, do biyëdina bëv dëw hni ɲa  
 tëkid!

<sup>4</sup> Njëtërun, Wënu ɲa kaÿëhnahnëlahna gë  
 wamëleka wante wënëk ɲa, bare ntabëkëhni  
 hnë umëhwëry vë janáma\*, ñabehnëkëhni gë  
 vankëncä hafo fac kitij ɲa. <sup>5</sup> Kaÿëhnahnëlahna  
 gë ɸuniÿa sër ÿa, bare atëvehnëko wënka  
 wacankaf hafo wãc wã kohnëhni fop vële  
 wok vëlënënhëlahna Wën va. Nowe, umë ale

\* **2:4** 2.4 Janáma: Gë wagërek ɲa janáma wãcik Tarëtar.

fëyadëhëhniwo vahnë ile satëk, gë vahnë mbëd gë vëhi vëyëntaŵ fo fehëtiko.✧ <sup>6</sup> Akitinjëk fëna vankol, Sodom gë Gomor; apëdëk vankol vatac hafo nko bëhn fo. Iyi dahëse vahnë vële wok vëlënënëlahna Wën va ye, soje tufini ile hnapëdëhëhni ya.✧ <sup>7</sup> Bare pehëtëka Lot, umë ale yeho ahnë asatah. Lot nudëhëhniwo vahnë vëvë vankol vatac vële wok vëlënënëna sariya ya do lidëho ndakëntal meh, do mbërehnëdëhawo dus hnë ntaŵary ntëŵu hna. <sup>8</sup> Ha, ayi asatah, ale yeho fagant lëŵ hni, nudëhëhniwo do nkwëryëdëhëhniwo fac-wo-fac, ntaŵary catah ntëŵu na korotëdëho soje vantiyehn meh vante nkok ñadina sariya va.✧ <sup>9</sup> Vëyin ru-fahnëd Ahwëhn a njëtëk gante pehëtëdëhëhni hnë uhorot vële wawëhnëdëha va, do njëtëk gante tavëdëhëhni vële wok vësatëna va korotëyehnahnini fac kitinj hna, <sup>10</sup> kas vële rëfëd viña vimeh mbahn vinte ronkënëdëhëhni, do yëwëk ucankaf.

Vëharanjam wamër va tamani dëcët, dakëdilëlihna njewënihëhni vële ye ambin cëmb hna. <sup>11</sup> Wëla wamëleka wante lëbëkëhni imëk gë fanka fa waryëkënalohna njewënihëhni haryënkwa Ahwëhn a. <sup>12</sup> Bare vëyi vahnë, had wulaŵ wahnënkawah nkeni, wale hnagik soje pëlayini do ndaŵini fo. Njewëdëni ile nkoni vëyëtëna do had wulaŵ, vëhni fëna ndaŵëdëni; <sup>13</sup> aki uhorot cosëdëni soje fop ile korotëyehnënihëhni viyënta hni va. Rëk tëkatëndëni uhnatah lëŵ hni g'idi wabal wameh

✧ **2:5** 2.5: Wapëgwala 6.1–9.28 ✧ **2:6** 2.6: Wapëgwala 19.1-35

✧ **2:8** 2.8: Wapëgwala 19.1-19

wadëw̃ hni g'anent pir tase vahnë fop; g'uhnatah ntifëni ile rokad̃ ge njini vambënt hun hna; wëdahëse waweh nkeni wale ronkënëd̃. <sup>14</sup> Fop vinahan vidëw̃ hni va soṇe vësëval ye. Vëravëd̃ina idi wameh ṇa, do tokad̃ënihëhni vële wok vëyaŵënëna nkaŵ̃ Këris ṇa. Vësan vële rëk mbalëd̃ d̃ëcët ye. Vëhni Wënu ṇa ndëwanëhnëkëhni wëh! <sup>15</sup> Atavëni nkaŵ̃ catah ṇa do cëvëni. Nkaŵ̃ Balam, ajë Bosor ŷa, tëfëni, umë ale ŷad̃ëho cosi soṇe ntihahn wameh ṇa. ✧ <sup>16</sup> Bare curiko soṇe wameh watac: fali fale wok kod̃ina nës nësahnëkawo gë kopa ahnë, soṇe tavëtehna kila Balam waṇi wanënkawah wante ñad̃ëho nti ṇi. ✧

<sup>17</sup> Vële haraṇëd̃ëhëhni vahnë wamër va, had wahayalin waguhah nkeni; had viṇar vinte campehnëk sël wëh nkeni fëna. Wënu ṇa pëhwëtanëhnëkëhni ŷëw̃a hn'ile mëhwëryëk d̃us hna. <sup>18</sup> Nësëd̃ëni wanës wante wok kwëhnana nafa, do mbalëtahnëd̃ëni viña vimeh vimbahn gë ndakëntal meh soṇe tokanihëhni vële sahnik takan va fagant vële wok lëd̃ëk wameh hna. <sup>19</sup> Ntehnëd̃ënihëhni kod̃ëni nkeni afaya do vëhni dënk vëramp iña inte vëvehnëd̃ëhëhni nkeni. Kabi ale-wo-ale nke aramp iñë ile wëkëka. <sup>20</sup> Vahnë va pehëtini hnë viyë vëvë nkal vile ronkënëd̃ vi kabi njëtëniha Afehët a, Ahwëhn fu Yesu Këris. Bare, ge viña vimeh vimbahn vambë kobëri va mbok pëlahni do mëkëhni, wapuyala wadëw̃ hni ṇa med̃ ntëbi gante nkeho wapëgwala ka. <sup>21</sup> Pecehnakëndëhëhniwo vëhni antë njëtëni

nkaw̃ catah iŋa, g'ile njëtëdëni do niyahnëni kwëda pacah nte karaniniho ŋa. <sup>22</sup> Ile rëkatëkëhni ŷi tufahnëk ile nësëko ŷa toña ye: «Ive ŷa mbokëd tok ile nkurëk ŷa»; do iŷin fëna: «Mpëhëmpëh ŋa ge njaryik mbokëd kërëŋëta wadaŋ hna.»☆

### 3

#### *Ahwëhn a njijëd*

<sup>1</sup> Vëŷahnik mën, wëlin kayëte kigëna nte herëhnëmu ŋa. Hnë vakitak, ndënkwëtehnëdëmu wante haranirunëho ŋa danko hnëgët hnë wahakili hun hna nahan catah. <sup>2</sup> Dënkwëtaryin wante nësëni kobëri ŋa wakila wapacah ŋa, gë kwëda Ahwëhn a, Afëhët a inte karanënihu vëfayik hun va.

<sup>3</sup> Yëtëryin ten waŋi: hnë wafac warëkwa hna, vahnë yijëd ndasëni viŷë vëva Wën va. Viña vimeh vidëw̃ hni va liyehnëdëhëhni rac. <sup>4</sup> Ndasëdënihu ntehnatëndëni: «Yesu dehnëna bi mbokajëd? Ne lë nkeha? Warëm fu w̃a cëmëni, bare ñoñ gwëcëtana kobëri ga ntihahnik nkal ŋi!» <sup>5</sup> Bare nkehëhna ani iñë ile ndënkwëni wakwëhnampër: kobëri ŋa, Wënu ŋa g'uhnës lëwu ntik ambin ŋa g'inkal iŋa. Pitëndëlehnëk nkal ŋa gë wënka ŋa, do gë fere wënka ntik nkal iŋa. <sup>6</sup> Do fëna gë fere wënka watac macënek do mbëvehnëk nkal mbë kobëri ŋa. <sup>7</sup> Uwi hnës dënk va Wën penak ambin g'inkal mbë gaki ŋi soŋe hwëdëh ha njij pëd vëŷi vi.

☆ 2:22 2.22: Wanira 26.11

Ambin ɲa g'inkal ɲa kwëtik hafo fac kitiɲ ɲa nte mbëvehnëdeni vēyēw̃ Wën va.

<sup>8</sup> Bare, w̃uhnë, vēyahnik mën, nke iñë ryampo ile wok tēfēlahna aryënkwu: soɲe Ahwëhn a, fac ryampo nke had wabëhn wuli, do wabëhn wuli nke had fac ryampo. ✧ <sup>9</sup> Vëryampo ntehnëdëni Ahwëhn a ñapëk gë idi ile nësëk ỹa, bare gena rac. Anduñënanëhnëkëfu, kabi ñadina wëla aryampo mbëv. Hali, ile ñad ỹa ale-wo-ale tav wameh wadëwu ɲa.

<sup>10</sup> Fac le mbokahnid Ahwëhn fu ỹa nanëtëdëhëfu had ale. Fac rac, kopa samah wëryëde, ambin ɲa namb ɲa nambëde, do viyë vile yehëhna hnam va mbëvehnëde. Nkal ɲa gë fop vile yehëhna va kitiɲëdeni.

<sup>11</sup> Kabi aki mbëvehnëde fop viyë vi, awa doliỹi yëkëryin d̃us hak nkeɗ uwám hun w̃a! Tëfëka afacu do ahwëhnawu nkeya nte ñad Wënu ɲa, <sup>12</sup> g'inap fac Wënu ɲa, g'idi fëna fop soɲe tēki kobëri fo. Fac rac hwëdëh ha mbëvehnëd ambin ɲa, do fop viyë vëvë yaɲ vi casëɗ. <sup>13</sup> Bare Wënu ɲa nësëk mbiyëk antid ambin kasëk, nkal kasëk, do usatah fo yed hnam. Rac hnapëden.

<sup>14</sup> Awa, vēyahnik mën, soɲe umë ye, kabi fac rac napëɗun, diryin fop soɲe ayewu haryënk̃w Wën hna vahnë vële wok vëhwëhnana dahëse wëh, vahnë vële wok vëhwëhnana ile niradëni, vahnë vële hwëhna yam. <sup>15</sup> Kwëtaryin iɲin vankaf hun hna: soɲe iduñëna Ahwëhn a hoɗerun afehëtaryiwu, had aÿënta fu Pol, g'usery ule njëɗaka Wënu ɲa, nësëhnëku vëkayëte vantëwu hna. <sup>16</sup> Koyëna nësëk fëna

---

✧ **3:8** 3.8: Wahnëw̃ 90.4



hně fop vėkayėte vantėũu hna. Nke viỹė vėle lakėk gwėry vėkayėte vantėũu hna, do vahnė vėle wok vėyėtėna ińė, do ikwėtahn dėũ hni ńa yaũėna, kumpėtėdėhėhni, had gante ntidėni ka hnė Vikerėh vińėntaũ ka. Aki mbėvėdėni vėhni dėnk.

<sup>17</sup> Vėỹahnik mėn, ŵuhnė dėnk, tame njėtėrun wańi. Awa, sońe umė kwėtėryin hakili, đanko antė ayentahniũu hnė idėnt vėỹeũ Wėnu va do aki do đanko antė cėvaryu iyaũ ikwėtahn hun ńa. <sup>18</sup> Bare naỹėryin g'ahaũary hnė ipėrėna g'iyėt Ahwėhn a, Afehėt fu Yesu Kėris hna. Arađi kwėhn icėmb ńa gaki do gė kantėm! Amina.

**Vikerëh Vikasëk Wën gë Wapëgwala**  
**Wamey: Vikerëh Vikasëk Wën gë Wapëgwala (New**  
**Testament+)**

copyright © 2018 Wycliffe Bible Translators, Inc.

Language: (Wamey)

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 21 Feb 2024 from source  
files dated 29 Jan 2022

f961026b-f72f-5bd7-9f75-efa7f932577e